

Na osnovu člana 223. Zakona o bankama ("Službene novine Federacije BiH", broj 27/17), čl. 5. stav (1) tačka h) i 19. stav (1) tačka c) Zakona o Agenciji za bankarstvo Federacije Bosne i Hercegovine ("Službene novine Federacije BiH", broj 75/17) i člana 12. stav (1) tačka d) Statuta Agencije za bankarstvo Federacije Bosne i Hercegovine ("Službene novine Federacije BiH", broj 03/18), Upravni odbor Agencije za bankarstvo Federacije Bosne i Hercegovine, na sjednici održanoj 27.02.2023. godine donosi

ODLUKU
O POSTUPKU ZA UTVRĐIVANJE POTRAŽIVANJA I RASPODJELE
IMOVINE, KAO I UTVRĐIVANJA I IZVRŠAVANJA OBAVEZA
BANKE U POSTUPKU LIKVIDACIJE

Član 1.

Opšte odredbe

- (1) Ovom odlukom se bliže propisuje postupak utvrđivanja potraživanja i raspodjele imovine, kao i utvrđivanja i izvršavanja obaveza banke u likvidacionom postupku.
- (2) Na banku nad kojom se provodi postupak likvidacije primjenjuju se odredbe propisa koji uređuju likvidacioni postupak i stečajni postupak, ako Zakonom o bankama nije drugačije uređeno.

Član 2.

Likvidaciona masa

- (1) Likvidaciona masa banke obuhvata cjelokupnu imovinu koja pripada banci u vrijeme pokretanja postupka likvidacije, kao i imovinu koju banka stekne tokom postupka likvidacije, ako drugim propisima nije predviđeno drugačije.
- (2) U slučaju likvidacije banke, sredstva računa javnih prihoda na koje se vrše uplate javnih prihoda na ime Bosne i Hercegovine, Brčko Distrikta Bosne i Hercegovine, Republike Srpske, Federacije Bosne i Hercegovine, kantona, gradova, općina i fondova, sa kojih se vrši raspodjela na račune korisnika javnih prihoda, izuzimaju se iz likvidacione mase.
- (3) Likvidaciona masa služi namirenju troškova postupka likvidacije, povjerilaca koji u vrijeme pokretanja postupka likvidacije imaju osnovan imovinski zahtjev prema banci, kao i povjerilaca koji u toku postupka likvidacije steknu pravo potraživanja prema likvidacionoj masi.
- (4) Prava trećih lica na predmetima i pravima imovine moraju se uzeti u obzir.

Član 3.

Početni likvidacioni bilans stanja banke, plan likvidacije i izvještaj
o finansijskom stanju banke

- (1) Likvidator banke (u daljem tekstu: Likvidator) je ovlašten i obavezan bez odlaganja ući u posjed imovine koja spada u likvidacionu masu i istom upravljati, izvršavati tekuće poslove u banci, naplaćivati potraživanja, izmirivati obaveze i ovlašten je i obavezan za unovčavanje imovine banke.
- (2) Likvidator je dužan odmah nakon stupanja na dužnost izvršiti popis imovine i isti dostaviti Agenciji za bankarstvo Federacije Bosne i Hercegovine (u daljem tekstu: Agencija), najkasnije u roku 45 dana od dana pokretanja postupka likvidacije (od dana imenovanja). Likvidator je dužan da za svaki predmet navede knjigovodstvenu vrijednost i očekivani iznos unovčavanja.
- (3) Likvidator je dužan sačiniti početni likvidacioni bilans stanja i dostaviti ga Agenciji najkasnije 85 dana od dana pokretanja postupka likvidacije.

- (4) Plan likvidacije koji sačinjava likvidator je sastavni dio početnog likvidacionog bilansa stanja banke i prvog finansijskog izvještaja koji likvidacioni upravnik sačinjava i dostavlja Agenciji u roku od 85 dana od pokretanja postupka likvidacije na usvajanje i davanje saglasnosti.
- (5) Početni likvidacioni bilans stanja banke treba da sadrži sve elemente koji su utvrđeni na način propisan u skladu sa Zakonom o računovodstvu i reviziji u Federaciji Bosne i Hercegovine i drugim propisima koji uređuju oblast računovodstva i revizije i propisima kojima se uređuju pitanja od značaja za provođenje postupka likvidacije:
 - a) stanje aktive (potraživanja) banke i pasive (obaveza) banke, te potencijalne vanbilansne obaveze banke, kao što su: izdate garancije, izdati akreditivi i drugi slični instrumenti,
 - b) sva imovina banke uključuje se u bilans stanja po njenoj tržišnoj cijeni ili procijenjenoj vrijednosti,
 - c) neophodne radnje za provođenje likvidacije.
- (6) Likvidator je dužan u roku iz stava (4) ovog člana sačiniti i dostaviti Agenciji na usvajanje plan likvidacije koji obavezno sadrži:
 - a) procjenu realizacije imovine prema kriterijima prestanka poslovanja po načelu neograničenosti vremena poslovanja, naplaćivanja potraživanja i unovčenja materijalne imovine,
 - b) iznos i ročnu strukturu osiguranih depozita po preostalim rokovima dospijeća i ukupan iznos osiguranih depozita,
 - c) izvještaj o ročnoj strukturi imovine i obaveza po preostalim rokovima dospijeća;
 - d) popis svih priznatih potraživanja razvrstanih po redosljedu prioriteta (isplatnim redovima),
 - e) plan diobe obaveza prema povjeriocima,
 - f) procjenu mogućnosti prodaje ili prijenosa imovine, prava i obaveza banke u postupku prinudne likvidacije u cijelosti ili djelomično,
 - g) plan komunikacije sa povjeriocima sa posebnim osvrtom na deponente i isplate osiguranih i neosiguranih depozita,
 - h) procjenu troškova postupka prinudne likvidacije, uključujući naknade likvidatora,
 - i) način organizacije rada banke u prinudnoj likvidaciji i radni status radnika, uključujući troškove raskida ugovora o radu i drugih poslovnih aranžmana (eksternalizirane usluge, savjetničke usluge i slično),
 - j) plan otkazivanja ugovora i svih poslovnih aranžmana koji nisu nužni za poslovanje banke u prinudnoj likvidaciji,
 - k) procjenu okončanja postojećih i potencijalnih budućih sudskih postupaka, uključujući potencijalne troškove za banku u prinudnoj likvidaciji,
 - l) vremenski okvir trajanja postupka prinudne likvidacije.
- (7) U postupku likvidacije utvrđivanje potraživanja i obaveza banke procjenjuje se u skladu sa standardima i procedurama utvrđenim Odlukom o uslovima kada se banka smatra nesolventnom, pri čemu se vrijednost imovine i obaveza banke za budući period uključuje i realna procjena iznosa prihoda i rashoda banke za taj period.

Član 4.

Prijava potraživanja povjerilaca prema banci

- (1) Likvidator je dužan da, u jednim ili više dnevnih novina dostupnih na teritoriji Federacije BiH, izda obavještenje povjeriocima da prijave sva svoja potraživanja prema banci, i to prvo u roku od sedam dana od dana prijema rješenja o imenovanju i drugo u roku od 30 dana od dana prvog obavještenja.
- (2) Svi povjerioci dužni su u skladu sa Zakonom o bankama da likvidatoru prijave sva svoja potraživanja prema banci u roku od 60 dana od dana izdavanja prvog obavještenja likvidatora.

- (3) Nakon što likvidator izvrši ispitivanje prijavljenih potraživanja, isti utvrđuje listu/tabelu prijavljenih, priznatih i osporenih potraživanja, listu razlučnih i listu izlučnih povjerilaca, sa podacima o povjeriocu, vrsti i iznosu priznatog/osporenog potraživanja, redosljedu prioriteta, rezultatu ispitivanja potraživanja, ko je uložio prigovor i obrazloženje, odnosno razloge osporavanja prijavljenih potraživanja koja nisu priznata. Iznos i redosljed prioriteta priznatih potraživanja upisan u listu/tabelu ima dejstvo pravosnažne presude. Likvidator obavještava svakog povjerioca o svojoj odluci po prijavi pismenim putem, dostavljanjem potvrde o priznanju potraživanja iz likvidacijske mase uz navođenje isplatnog reda u koji je potraživanje priznato.
- (4) Ukoliko je likvidator osporio određeno potraživanje, povjericima određuje rok od 15 dana za podizanje tužbe radi dokazivanja osnovanosti osporenog potraživanja. Povjerilac koji pokrene parnicu dužan je po isteku roka za podnošenje tužbe u narednih 15 dana obavijestiti likvidatora o pokretanju parnice, pri čemu likvidator prilikom diobe zadržava iznos koji otpada na tu obavezu.
- (5) Ukoliko povjerilac u ostavljenom roku iz stava (4) ovog člana ne pokrene parnicu njegovo potraživanje prilikom diobe ne uzima se u obzir.

Član 5.

Prioriteti isplata obaveza banke u postupku likvidacije

- (1) Postupak isplate obaveza banke u likvidaciji provodi se po prioritetima u skladu sa odredbama člana 227. Zakona o bankama.
- (2) Isplata obaveza banke u postupku likvidacije provodi se u skladu sa planom likvidacije koji je sastavni dio izvještaja o finansijskom stanju banke sačinjenog od likvidatora i odobrenog od Agencije. Likvidator najmanje jednom u tri mjeseca dostavlja Agenciji izvještaj o realizaciji plana likvidacije.
- (3) Likvidator je ovlašten da izvrši isplatu obaveza u okviru sredstava koja su na raspolaganju i na pro rata osnovi, ako je primjenjivo.
- (4) Likvidator suspenduje isplatu bilo kakvih obaveza banke prema članovima nadzornog odbora i uprave banke, odbora za reviziju, dioničarima banke koji učestvuju sa 5% ili više u glasačkim pravima, odnosno vlasništvu nad kapitalom, povezanim licima i povezanim bankama, sve dok u potpunosti ne budu isplaćene obaveze prema drugim povjericima banke.
- (5) Treća lica koja djeluju u ime fizičkih i pravnih lica iz stava (4) ovog člana, kao i članovi uže porodice, srodnici lica iz tog stava po krvi i po tazbini do trećeg stepena, također nemaju pravo na isplatu dok se svi ostali povjerioci banke ne isplate u potpunosti.

Član 6.

Prebijanje potraživanja i dugovanja

Prebijanja potraživanja sa dugovanjima banke mogu se vršiti samo po redosljedu prioriteta isplata u procesu likvidacije utvrđenim Zakonom o bankama.

Član 7.

Prodaja imovine i obaveza banke u postupku likvidacije

- (1) Tokom provođenja postupka likvidacije likvidator ima ovlaštenje, u skladu sa Zakonom o bankama, uz prethodno pribavljenu saglasnost Agencije, da:
 - a) proda dio ili cjelokupnu imovinu banke,
 - b) proda dio ili cjelokupnu imovinu i obaveze banci ili drugom licu ovlaštenom za obavljanje tih poslova,
 - c) proda ili spoji banku,
 - d) likvidira banku, u kom postupku odlučuje o osnovanosti i isplati zahtjeva povjerilaca prema banci.

- (2) Prodaja i preuzimanje dijela ili cjelokupne imovine i obaveza banke vrši se bez saglasnosti deponenata, drugih povjerilaca i dužnika banke.
- (3) Likvidator je dužan da, prije provođenja prodaje dijela ili cjelokupne imovine i obaveza ili prije prodaje ili spajanja banke, pribavi saglasnost Agencije.
- (4) Likvidator je dužan da provede prodaju dijela ili cjelokupne imovine, prodaju dijela ili cjelokupne imovine i obaveza banci ili drugom ovlaštenom licu za obavljanje datih poslova, odnosno da proda ili spoji banku u skladu sa Zakonom o bankama, tako da:
 - a) postigne maksimalnu cijenu takvom prodajom ili raspodjelom, radi zaštite deponenata i ostalih povjerilaca banke,
 - b) osigura ravnopravnost mogućih kupaca ili partnera za spajanje i
 - c) onemogući bilo koju vrstu diskriminacije prilikom nadmetanja i razmatranja ponuda.
- (5) U toku provođenja plana prodaje ili spajanja banke Agencija može, uz pribavljeno mišljenje likvidatora, obustaviti taj postupak i donijeti rješenje o nastavku postupka likvidacije i drugim primjerenim postupcima u skladu sa Zakonom o bankama.

Član 8.

Prinudna naplata u postupku likvidacije

- (1) Likvidator je ovlašten za izdavanje rješenja kojim se nalaže prinudna naplata sa svih računa neurednih dužnika banke u likvidaciji i/ili jemaca tih dužnika koji su otvoreni u drugim bankama koje imaju sjedište u Bosni i Hercegovini, kao i blokada svih njihovih računa do potpunog izmirenja ovih obaveza, u skladu sa odredbama Zakona o unutrašnjem platnom prometu, Zakona o izvršnom postupku i drugim zakonima.
- (2) Rješenje iz stava (1) ovoga člana ima snagu izvršne odluke i prinudna naplata po istom izvršava se prema redosljedu prioriteta utvrđenim odredbama Zakona o unutrašnjem platnom prometu koje uređuju izvršenje plaćanja i prinudnu naplatu s računa, kao i odredbama Zakona o izvršnom postupku koje uređuju obim i redosljed izvršenja novčanih potraživanja.

Član 9.

Završni izvještaj o postupku likvidacije

- (1) Likvidator je dužan na kraju mandata da sačini i dostavi Agenciji završni izvještaj o postupku likvidacije i njegovom okončanju, sa obrazloženjem realizovanih mjera.
- (2) Pored navedenog izvještaja, likvidator je dužan dostaviti Agenciji konačne finansijske izvještaje u obliku i sadržaju propisanim Zakonom o računovodstvu i reviziji u Federaciji Bosne i Hercegovine.

Član 10.

Prelazne i završne odredbe

Stupanjem na snagu ove odluke, prestaje da važi Odluka o postupku za utvrđivanje potraživanja i raspodjele aktive i pasive prilikom likvidacije banaka ("Službene novine Federacije BiH", broj 90/17).

Član 11.

Stupanje na snagu

Ova odluka stupa na snagu osmog dana od dana objavljivanja u „Službenim novinama Federacije BiH“.

Broj: U.O.-09-02/23
Sarajevo, 27.02.2023. godine

PREDSJEDNICA
UPRAVNOG ODBORA

Ivanka Galić, dipl.ecc., s.r.

